

四庫全書

集部

欽定四庫全書

集部

丹陽集卷十三

四

詳校官庶吉士臣張溥

侍讀臣孫球覆勘

謄錄舉人臣秦

櫟

欽定四庫全書

丹陽集卷十三

宋 葛勝仲 撰

墓誌銘

左朝議大夫致仕祝公墓誌銘

公諱康字道濟崇寧元年守魯郡時某分教諸生公遇之厚因與公之子天輔周旋後十三年天輔之子將仕郎溫彥踵門泣曰先大考葬宜有銘先考欲求夫子為之今敢以治命請謹行許之是賜逮三世也乃撫其狀

叙曰祝氏著籍單州成武今為滑州韋城人公之父曰
諮兩第進士積官至太常少卿糾察在京刑獄贈金紫
光祿大夫娶天水尹氏女生公是為永嘉郡夫人祖曰
惟嶽卒官虞部員外郎贈戶部尚書曾祖曰密贈殿中
丞公性夷澹無浮念外好獨喜觀書載籍畧皆誦記名
能文辭四貢禮部一為舉首以門蔭補將作監主簿第
試異等賜明經出身入刑部為習學公事法直官又為
檢法詳定官入大理寺為法直官又為評事入書局為

官制檢詳文字又為元豐編勅所刪定官刪定一路勅
令又為元祐勅令所刪定官入尚書省為刑部員外郎
又為郎中除知趙晉潞兗四郡管勾南京鴻慶宮遂得
謝官自承事郎十遷為左朝議大夫勲自武騎尉十一
遷為柱國服佩朱衣銀魚初金紫公號文無害屢更中外
法理之選小大之獄申理枉撓甚衆故公於刑名之學目
擣耳染不習以能元豐中神宗皇帝欲入仕者通習文法
始建律學又每歲聚天下士課試刑法錄上第者顯擢之

凡廷尉憲部臣屬皆推擇除授而公與兄庶首被識拔並游法寺衣冠慕之公於斷獄論議持平人謂不寃至刊定律令立言寓意非法家識慮所及故凡置局輒預累朝刑典悉關其手出刺全趙施張綱紀如世吏師大姓范某以姦俠亂吏治前二千石欲制者輒持短長公疏其宿負逮繫累月案致其罪郡中股栗民吏大驚相戒毋犯公法蓋公前此未嘗更民事也達官勢人薦其材者四十輩在上黨頗以愛利為心歲比不登誘溫戶

出粟廩餓者全活萬計死者具衣槨收瘞之遺愛至今
誦民口在東魯為朝廷大興學歲貢賢能辟靡復古賓
興法公讀詔奮曰吾邦孔孟舊里周公封國也修起學
宮宜甲他郡因撤舊宇一新之為夏屋三百區間從衆
儒論難經訓文風大振隸弟子籍者數百人郡事靡密
煩碎必躬親之結課異等既受代天輔為鄆州州學教
授近請之官崇寧四年三月丁卯以疾卒於鄆春秋六
十有七公天資粹和志行高整好延譽人而樂人規已

接待僚吏恩施甚厚有過者平鍰使改不使麗罪人皆
德之內行甚修居母喪毀瘠不食鹽酪服除有出世間
意以父命勉仕故訖其身惟衣䟽布進侍親油油翼翼
寢食不敢先輟奉賜班宗族之貧者猶子天任早孤撫
之盡其恩先已子而官之仕遵三尺因俗為政雖寬猛
異施而所臨稱治先娶清河張氏贈旌德縣君今夫人
洛陽范氏封崇德縣君改封永福君恭人皆有賢操男
即天輔好學自立試吏部第一舉進士又舉宏辭皆中

第終承直郎孫三人長即溫彥次清彥冲彥女適武學
博士李子奇亦屢登科選庶今為朝請大夫提舉西京
嵩山崇福宮天任今為朝散大夫公以其年十月癸酉
葬開封府長垣縣太平鄉永寧里鄧崗之南原銘曰陶
唐之後中絕不續武王反商國之於祝單父大家再徙
韋城自公顯考摠國祥刑申直頗類為天下平騫翔要
塗公寔濟美決獄刊令不為峻抵入為臺郎出長郡治
以法為師得法外意在皆仁者子孫必興于門駟馬虞

胄九卿公躬弗羸隱德多有源深流長寔燾厥後

朝散大夫致仕柱國賜紫金魚袋侍其公墓誌

銘

公諱瑋字良器姓侍其氏蘇州長洲人也世序自先漢
廣野君之裔孫賜氏食其後有為武帝侍中者因又合
官與氏而稱今姓曾祖仕李氏知吉州歸朝任監門尉
大將軍贈左神武衛上將軍諱禎祖右侍禁諱憲考贈
右正議大夫諱泳家世以武顯族大且貴聞天下公獨

自刻習儒學詞章從進士試皇祐二年中第調杭州富陽開封陽武二縣主簿掌書記閬州改著作佐郎知池州建德縣遭正議憂服除知光州固始縣監鄂州酒又知吉州之永豐簽書桂陽監判官稍遷通判全州移刺化州又刺池州表請致仕積官至朝散大夫勲柱國賜服佩視三品富陽故兩稅局一隸主簿公至課輒倍他日專征者負殿且罷斥公悉推羨數畀之使償逋額課更以最上而公以此稱長者陽武官僚繼踵坐法免公

齒少獨當大邑風政凜然殊異府尹包孝肅公材之檄
攝右軍巡判官至則為之盡力有亡命卒坐剽金論棄
市獄具公覆視文案疑有冤訊得其情白尹為平傳之
囚以不死在職滿歲申活枉撓以十數濟辦府事隱然
名動諸公尹滋材之欲表為真人謂公且階此顯仕而
公方薦所知自代尹義而從之河水怒溢嚙埽決壞朝
廷出制使馳視公身臨水衝料丁壯早莫護作遂以塞
聞任事者皆進秩獨不自言在固始詢求遺便嘗穿永

清南津二渠漕粟溉田交賴之永豐大姓持吏短長因橫恣漁食閭里又土俗以鼠莽蠱毒殺人公禁沮立絕全守武人不閑吏治公陰為處議每條教下自幕府不知由公出也化州僻陋下車築校舍置諸生誦說間為擁經親授義訓人士知趣學自公始也有州佐自海南代還經郡市征者故與有仇以匿貨文致其罪公廉知狀為處平之州佐欲挾公修憾則䟽其宿負求窮竟之公亦無所聽繇此兩人交德公因有坐至重辟者為奏

謝得減罪一等已而錄見囚縱出之佐史大驚公曰是
羸瘦不堪杖之必死謝之前而殺之後其去幾何人
服其敢為居六年不代化行南土歸裝無嶺外一物當
世清之在池州籍記桀猾主名或犯禁輒披籍與重比
以故姦不迹境郡中翕然稱治未幾召還遂請老公性
靖退知止足奉公孤立特介以質謹自將不肯撓節媚
權近仕進淹晚一不綴懷夙嗜學問喜聚書自少訖老
未嘗一日去篇籍不觀工草隸善屬文賦詩尤多時稱

佳筆製續千文行於世內行孝友加人始官錢塘迎祖母賈氏夫人以養承顏盡其歡是時族千指賈方專家政能使忘歸焉服前後喪皆哀懼不自勝吳中賢業前推以瞻同產子晚節無所於歸因徙貫宣城招季弟共居視遇與已無厚薄退居十年論議本忠厚專以表善調急為心江左衣冠仰為軌式春秋雖高精明如壯人俄屬疾甚微沐浴更衣命左右掖坐若將寐者泊然而逝崇寧三年十月丙辰也壽八十有三五年九月丙申

葬於宣城縣萬松山之原母夫人王氏太原郡君兩娶
施氏封仙居永嘉二縣君皆有賢行男五人鉉桂州永
福縣令錡前卒鏐通州司法參軍鐔劍舉進士皆有學
守孝謹祥順名能世其家女三人皆嫁婿路慶隆為左
班殿直蔣忱為藤州鐔津縣令王彥思為鄂州蒲圻尉
孫男女十三人某侍其自出也先夫人北海君于公篤
友愛平時道公事不虛口故其不肖子得公世次行治
勞烈為詳義不敢以疵賤辭母銘也因泣銘曰侍其之

先高梁啟封以官命氏縣漢侍中逮公曾祖脫迹建業
以武奮功桓桓累葉公以學藝收科自躬與道進退不
棘於逢龜紫朱輪吏二千石豈曰不逢未配名德惟德
之配天則大之康寧壽耄子孫頤頤有窾新宮兆墨云
食詔萬斯年篆此幽刻

右朝散大夫侍其公墓誌銘

右朝散大夫北海侍其公諱鉉字希聲紹興七年正月
辛未得謝丙子終於宣城里第年數八十有一其孤升

卿以其年三月甲寅奉公柩塋於縣仁義鄉萬松山先塋之東以某侍其自出謂公總兄實熟公世次行治再抵書求銘乃泣為序而銘之曰侍其氏自漢廣野君之元孫賜氏食其又三世始因官改錫今姓而望出北海者尤多顯至公之高祖諱禎仕李氏知吉州歸朝授左神武衛上將軍生右侍禁諱憲始自建鄴徙家蘇之長洲侍禁生贈右正議大夫諱泳名清正篤行君子正議生公之考諱瑋起進士歷刺化池二州焯有聲烈贈金

紫光祿大夫公以父任調永州司法參軍前律後令夙
曉習吏不敢弄歲饑盜有強劫人禾而傷其主者州將
且論死公固爭曰歲災不可麗以常法會德音降從流
坐公仍爭之謂當以流為本罪而用赦末減已而讞以
聞廷尉果是公議蓋公初仕不苟於職已如此用薦者
遷桂州永福縣令擊斷明審廷無留事且受代府帥若
部刺史惜其去創州鹽倉闕表公就職府帥曰吾僚通
敏無踰之者仍委兼幕府督司諸公曰我言其材規以

自助因交屬以事公黎明坐曹夜漏下數刻始得休衆
職俱辦魁然見頭角廣西並邊州縣例以官鹽逼新民
使售公虞生變獨輦鹽入洞自置場鬻之民夷以為便
課更大登以外艱去位服除會蠻獠初以平允從等州
入版籍丞相唐公恪時將漕江東銜命撫諭詔以公為
恪幹辦官公既馳至桂管代其長入險遠洞寨時酋渠
情不測或請擁勁兵自衛公曰宜輸寫心腹綏懷之詎
可以鎧仗市疑耶因單裝往蠻人始衷甲荷戈逆境上

望見使者惟一二僮從乃投兵免胄就燕犒公具宣天子德音皆環公拜且泣曰不圖徼外蠻夷今霑聖化他種落艷寵相繼効土疆後使至不能如公示以悃誠變起尊俎間繇是廣人益追誦公之能使還策功第一特改秩授宣教郎除在京諸軍審計院出知潯州公不鄙其民膏枯撫羸一以恩信民化服之州置監冶鑄鐵錢以緡計者儲數百萬一日更圜法命悉消毀公獨奮曰事固未可知格詔存之後果復用省費不貲代還除在

京諸司糧料院擢知蜀州時方復古賓興法公慨然以
誠意助樂育鼓篋交至間有名士踞弛抵罪者輒縱舍
之後多拔高第已蜀文雅遂光前世秩滿除開封府司
兵曹事以郊祀恩賜朱衣銀魚府曹牒訴叢委異時劇
吏抱成案持必於官公獨親裁事論貸輕重咸出已見
無銖髮枉撓尹賴之朝廷知其材任劇擢潼川府路轉
運判官欲用矣遇妻喪請郡便家除知徽州未行改均
州遂請散局得主管亳州明道宮以歸初金紫公既倦

仕樂宣城丘壑之勝築室居之蕭散十餘年而公名爵
壽耄一與之埒談者推為仍父子之美云易簣前一夕
與親友銜杯至夜艾體初無不平鷄一鳴呼侍媵取燭
家人起視已正坐逝矣公為人外方嚴而內樂易仕惟
平進所湫有明恕之響獨喜文籍視他世味如嚼蠟也
官永福日忽起親念即假歸冒瘴獨往返萬里不憚既
除喪悉推先業畀諸弟之未仕者族子貧困異縣招致
共居調護之尤篤數官南服歸裝無珠犀一物中年從

方士學導引吐納術故年殊八十而耳目筋骸堅悍不
衰官八遷為右朝散大夫娶劉氏太子中舍敷之女封
榮德縣君累封宜人子長曰瓘早世次即升卿右迪功
郎池州青陽縣尉女三人嫁撫州金谿縣丞王叔全左
宣教郎前徐州州學教授徐揖左朝散郎前興國軍學
教授桂南升孫光祖慶祖皆以公蔭補將仕郎銘曰昭
亭之陽兮張祁之里泉播播兮石齒齒靈氛卜幽寔兮
曰燾慶而儲祉揪柏相望兮父母孔邇公既脩夫嫜節

兮又申之以內美名光策書兮祭有孫子嗚呼公兮一
無憾於生死神明其升兮體魄安此

左承議郎致仕丁公墓誌銘

吳興山水清遠世產第一流人本朝以文學政事風節
致高位稱名臣者磊落相望而高蹈著聞者自祕書丞
朱臨先生始先生皇祐進士以壯齒得謝里居自號少
翁遠近慕其節師尊之自是邦人以知足自勵歸不待
年者亦踵相躡公其一也公諱安常字權中世家湖州

德清以諱某者為大王父以贈中奉大夫諱某者為王父以中大夫贈光祿大夫諱某者為父而謂少翁外王父也公少有識量強立早成率諸弟游賢關聲號籍籍光祿公遇恩當上一子公居長而請先其弟崇寧五年果自以經術擢進士第調開德府法曹參軍年少耳所為已卓越動人劇吏不能翫法弄事閱三年將解秩轉運使許儿器其才常表以自佐遷從事郎澤州司戶曹事會朝廷營室下河東調大木鉅萬異時役夫斬木太

行頻陟險峻手足偶失措輒顛墜崖谷死者不可勝計
部使者檄公護役且誘以重賞公曰薄人於險而已尸
其利非仁也始吾不願仕者正以違已為病今豈戀此
幘哉因求謝事郡守丞力挽留之抑其奏踰月不上而
志不可奪遂以宣教郎致仕是歲春秋纔三十八光祿
公喜曰而夙慕少翁高世行今不愧之矣宣和末給事
盧公襄守吳興與公有學省同舍之舊每叩門問政已
而被詔朝京師且率貴近交章起公因請俱行公笑曰

門既杜脫復啟寧不畏北山叢條譏人耶卒不屈中年
益厭城市喜菁山巖壑之秀且有葛稚川遺跡乃即其
地築草堂環蒔松桂桐竹日倘佯其間未幾金人侵浙
右士大夫南奔者無所歸公時糧掃舍為之主有黃朝
隱者素昧平生自金陵興疾來求寓公為調護其疾俄
不幸厚禮葬之公樂賑人之急概如此兩逢踐阼恩遷
奉議承議郎加賜朱衣銀魚積俸錢百餘萬皆置不取
紹興十二年九月某甲子公年六十有五終于家以其

年十二月某甲子葬湖州烏程縣游仙里葛山之原配
羊氏父曰奉議郎徽卿封孺人男曰士龍強學有文嘗
薦禮部曰士遜士元尚幼女長適右修職郎江南西路
轉運司幹辦公事閻鑾次適右承務郎葛邵次適將仕
郎姚端誠孫男女合三人公性嗜書遇警策必手抄而
心記與客語纒纒可聽自奉孔薄至可以利衆若聚圖
書聘師友一不靳對童賤禮意恂恂與人交無新故悉
竭誠悃一話一言洞見肝膈或問死生之理憮然應曰

彼怛化者行有不慊於心者也吾委順而已洎且死起
居言語如平時家人迎鑿及門已逝矣嗚呼豈退居二
十七年之功用在乎彼抵巇射進夜行不止而位高
祿富碌碌與草木俱盡視公所得孰多耶某再仕此邦
晚復卜居近郊寔仰公行義且辱薦息女為孫婦方圖
與公黃冠野服相從泉石間而公遽不幸悲夫初光祿
公以進士起家入總樞貨出刺邠光二州有材力撥煩
之譽官其子三人公與弟安止弟子雄飛復能挹世科

而子姓與賓薦者相屬故今衣冠儒學盛家推丁氏興
蓋未艾也銘曰丁公儀儀早謂瑰竒學於古訓弗懈弗
墮一世所難獨勇為之一世所願顧謝不窺天相其功
開迹宏大以壯為老浩然夙退才雖不施志則云遂媚
于林丘優游卒歲塗轍弗升於天奚懟天卒相之子賢
而文圭組赫奕豈必其身

承議郎王公墓誌銘

公王氏諱登政和二年唱第宸筆賜名因字廷錫其先

太原祁人自公五世祖始徙貫婺之金華縣公幼孤困窮痛自奮激學問既長名通經能文詞遠近學子請業者甚衆再中鄉書一以郡上舍升貢辟雍省復兩預國學薦始擢第調衢州盈川楚州漣水二縣丞改宣教郎知越州諸暨縣秩滿差知潭州湘潭縣會課遷奉議郎逢今天子踐阼恩遷承議郎盈川嘗行令事人有詐為祠部度僧牒鬻於市者公發其姦捕得之格當增秩愀然歎曰寘人重辟而已顯其利仁者為是乎因縱使自

言卒用首法減死政和八年秋郡國大水漣口當淮泗
下流支川所匯公俟水之未至增築城牒已而水噬城
不沒者三版邑人謹曰微吾丞公吾曹其魚矣公復峙
餼糧儲械用旁郡流移至者如歸全活數千計盜劫諸
暨溫戶沈淵家久未得朝廷洎部刺史督捕苛峻前令
執錢唐兵與盜同姓名者鞠訊成獄既具且上府會公
視事以牘及囚辭氣參聽得其冤狀亟縱出之一府傳
疑檄縣再錄囚雜治公弗聽明年盜自通於河朔移文

至邑聞者始大驚服公之聽斷明多此類也仕歷四邑
外嚴中恕砥節礪操不可干以私湘潭官期滿踰年無
趨治意方且市丘隴治棺槨若前知死生之數者俄屬
疾語家人以去來常理易簀無憾以靖康元年四月某
甲子逝年數六十有一大王考某王考某不仕考某贈
宣教郎娶大理寺丞陳琬之女封儒人男長曰師醇次
曰師心宣義郎監信州泂口排岸季曰師古長季俱嘗
升名禮部孫男二人濡演諸孤將以二年三月丙申葬

公赤松鄉黃枇塢而遣人抵書以銘見屬始某自大司
成出領官祠寓居襄賁因與公父子游見公靜退不以
榮槁措懷獨進諸子於學甚厲日論說文義以磨礪浸
灌之方是時師心始冠已能用經術取上舍第而師醇
師古皆軒然有邁往之韻予固心器之矣其後師心為
海州沭陽尉遇京東劇賊數千人浮海來寇公適就養
在邑命引兵邀擊境上馘渠酋數十人降其餘衆一道
賴以按堵太上皇帝多之降御筆詔褒諭衆譁說交譽

而不知計畫多自公出也嗚呼使公得為世用智畧効
見當何如哉銘曰既艱其成始發其榮宜永其享而嗇
其齡絃歌兩城位不配能有息俊英亦足除乘吉壤安
靈孝子所營我為之銘以遠德聲

奉議郎致仕周公墓誌銘

公諱某字彥霑姓周氏其世序自晉左僕射顓孫安成
渡江徙建康至公之高祖復避五季亂繇建康徙毘陵
芳茂山之陽故今為常州晉陵人公幼聰穎後母俞氏

撫之均已出故公雖壯長不知復有所生母其兄子彬
且死屬其故舊吏部侍郎霍公端友曰吾叔性淳至不
知所生杭氏在外也可須其登第語之紹聖四年公以
進士解褐調開封府鄆陵尉還里中霍公具以告公聞
知感慕誓見母乃出仕即以所賜袍笏束囊承塵上易
野服菲屨走遠近村疇物色求之一夕夢雨霽有指冢
言曰此君母也詰旦之隔湖訪求有老父告曰我知之
死再歲既葬矣引而示之冢時雨初止宛與夢合公慟

絕即易棺衾護歸具禮改葬稅三年之服哭泣哀傷踰
逮事者當是時同學諸儒共臨祭醊而霍公製文詞極
酸楚後十餘年霍公執太史筆復作記叙本末以傳世
云免喪補泗州司法參軍持議平淮南饑多盜大率規
微利輕殺人公哀之每當以輕比所全甚衆盜有匿人
之車者他日失車家復失牛意前盜執之掠死州將欲
以殺不辜坐之公爭議請讞從之廷尉果當以不死遷
通仕郎台州臨海丞嘗按他訟寓宿僧舍有僧暮夜為

訟者以金餉公求撓法公錄付郡寘于理秩滿戶部辟
監萬歲院石炭場用薦者改宣德郎授建昌軍司錄事
歸數月屬疾請老遂以奉議郎致仕遇郊祀恩賜緋衣
銀魚宣和六年十一月癸巳終壽六十有二公性莊重
而靖默孝謹質厚篤嗜墳籍三薦始得第以祿不洎因
薄其官不復干進既謝事嚴除一室取異書洎黃老浮
屠之學手抄節不知寒暑飢渴晝夜如是者蓋十有二
年疾猶不置卷嗚呼與夫志在名利而以學為市者殊

科矣執前後喪皆哀矜晚節每與疾省丘墓著先塋訓
誠一編引古今冢墓神靈顯著事數十條以詔子孫有
遺藁二十卷曾大父某不仕父某贈朝散大夫繼母俞
氏贈宜人所生母贈孺人娶沈氏封孺人子德先行先
以某年某月日葬公於某原而見委以銘某於公為同
年進士且又喜公之子賢孝有學守不墜世緒因樂為
論次竊復觀近時搢紳孝德感通事迹類公者皆得表
顯於朝具載天下耳目而公以位卑夙退事不大白因

掇是節表出之以為公銘其辭曰棘天天其峻茂兮莠
蓼蓼而愁絕母聖善而昧平生兮將趼吾足而求索后
皇命靈氛而降衷兮告以正夢而昭晰皤叟指馬鬣而
相示兮痛春暉之永訣仰天泣血而心折兮雖稅服其
何濟也聊黽勉以出仕兮終守丘隴而卒歲也蹇年位
之甚瘠兮羌校德而特豐我書嫵節於億年兮閱孝子
之幽宮

右奉議郎致仕賜緋魚袋魯公墓誌銘

宣和七年天子冬祀上帝推恩廷臣提舉福建路市舶
魯詹得其父為承事郎致仕歲中逢淵聖皇帝受內禪
恩進封父宣義郎且乞以當得朱衣銀魚改賜詔從之
上踐阼覃霑若南郊明堂恩詹為直秘閣福建路轉運
判官又累封其父為右奉議郎惟奉議公諱壽寧字景
脩秀州海鹽人魯姓自魯滅于羊子孫以國為氏而扶
風之魯漢晉代有顯人至橫江將軍肅始踰淮居吳之
曲阿中徙嘉興隸名數海鹽自公父始公家故貧既孤

與兄弟共理賢業雍睦聞東南稍溫斥所有闢文館延
名儒教飭羣子弟已而長子詹舉進士中某科開迹入
仕未幾以才器自見膺被識擢更中外顯曾劇部而公
身及享其寵規模智識之遠人士多之公為人外樂易
而中方質出處取予常徇義而動恬於世味而奉已刻
削中年敕諸子勿復以家政相關屏居一室食不擊鮮
非披佛書則習禪觀精苦如山中頭陀轉識誓必生淨
土紹興三年詹為樞密院檢討官取告歸壽其親俄以

疾不起人謂公老而哭子且不堪其憂公一慟即知自
廣處餘年誓言二子並特賜第閭里歆艷而公無津津
喜色蓋公探道有得視死生榮辱如寒暑旦暮故哀樂
不能汨其心如此公生皇祐癸巳閱七朝更五百有二
十四甲子而步趨視聽不衰顛髮猶黑九年秋七月屬
疾丙戌召常往還僧可觀謂曰吾誦彌陀經無慮二十
餘萬他契經數不可紀已面佛自列師其證明吾且逝
矣俄召嫺族叙訣復呼子孫前教戒各盡其意且曰我

聞佛說執持彌陀號七日心不亂決生安養吾雖淨業
已熟宜遵佛語復顯心七晝夜自是不復飲食語言惟
口囁嚅若有所誦越癸巳亭午始泊然善逝正七日也
曾大父承秀大父延厚父惟辯比三世不仕而德義有
聞娶劉氏贈孺人亦篤奉釋教嘗嬰疾即醫錢塘命千
僧禮迦文塔興疾膜拜俄現毫光赫奕亘天傾城來瞻
讚歎希有瀕死亦有善證嗚呼豈夙昔與公同為善知
識乎何其緣契之符也子六人長即詹終朝奉大夫次

慧靜出家為比丘次謇右迪功郎監潭州南嶽廟次譽
未仕譽嘗皆左迪功郎女一人適進士陸紳及公之存
孫男十有三人可度右迪功郎可久可儼右迪功郎新
授江州彭澤縣尉可立將仕郎可封右迪功郎湖州德
清縣尉可復可傳可大可輔可觀可宗可受可羣孫女
十四人曾孫男女七人公以歿之年十月癸酉寔於縣
東武之原與劉孺人偕葬謇等清明邁往力學問自立
諸孫復巍巍見頭角今推儒學聞家必曰武原魯氏流

慶蓋未艾也以某有素猥屬以銘不敢辭銘曰本自無
生湛靜真常寓形攜李豈曰公鄉本自無滅圓明虛寂
藏魄東武豈曰公宅西方妙樂以淨為緣淨業相應報
土現前不歷僧祇得大解脫銘以著之用警來哲

欽定四庫全書

丹陽集卷十四

宋 葛勝仲 撰

墓誌銘

宣義郎致仕王公墓誌銘

公王氏諱繹其先京兆萬年人晉代徙貫四明有諱文序者仕錢氏為奉化令吳越國除從歸朝又徙蘇州今為平江府永冠著姓文序生愈舉進士五對策於廷入官卒贈右金吾衛大將軍於公為曾祖金吾生琚歷廣

西淮東二路提點刑獄贈左武衛大將軍於公為祖武
衛生安仁知沅州軍州事娶長壽縣君丁氏生公公字
彥成懋德自立處家庭孝恭慈良有愉色之順居鄉黨
清正愿慤無擇言之闕該覽羣籍尤邃於易手抄諸儒
章句數萬言家貧屢空不營資業客或啟勸輒酬以他
語奉身貶約遣諸子受業給其費顧豐泰已而二子崇
裳以詞藝顯名相繼拔上舍第効官近境公往來更就
其養在公府簡默不交人士設棋野自為勝負置酒鐙

自為獻酬容色閒暢人莫窺其際子孫所為有不當其
意者不顯鐫斥微示以意僅役或盡歲無所譴罰性寬
如此紹興元年天子合祀天地於明堂時棠知湖州烏
程縣棠知秀州海鹽縣丞上章聯封授公宣義郎致仕
明年春棠諡於朝乞去位侍養詔除主管西京中嶽廟
方是時某為吳興條其政蹟表留以自佐會後太守翰
林汪公繼以請詔俾還職因取急與棠自海鹽迎公至
縣治三月某甲子卒於烏程年數七十有二且死語家

人曰先賢臨絕有主無神鬼驚忤者吾今政爾不亂與
類畢泊然而逝無遺令一語娶東平安氏郢州防禦推
官冲之女贈孺人賢操實克婉德前卒子三人棠左承
議郎棠左奉議郎鏗幼未仕孫男女十有二人歿後二
十有六日與孺人合葬於吳郡天平山之北初公里居
專以教子孫後食其祿者十餘年以生受朝封二息並
時官浙右兩州賓客豪傑若民吏皆德公之子爭贊善
奉觴為壽病則交迎醫歿則致奠醊者相屬故時論推

為哀榮焉棠棠學術文辭秀出流輩所交惟賢所泣號
治執喪哀矜於送終無所不盡與余游俱習乃見屬以
銘銘曰性介而通德清而容嗜學助躬不諱其窮有子
俱逢祿釜有饒裡祀合宮名聞帝聰肇享爵封命服惟
衷眉壽令終祖考其從後初顯融且侯且公其柏其樅
過者必恭

文林郎姜公墓誌銘

姜姓本出天水太公望封營丘後世為田和所滅子孫

散徙而天水之姜曰肱曰維顯名史氏至恪公輔相唐高宗德宗益號冠姓君其裔也諱周臣字仁輔世居睦州建德莫知其始徙曾祖考及祖考延德考逸皆不仕君少孤母李夫人訓使學專精自厲已而文詞經術隱然稱諸儒中元豐八年進士第調温州永嘉江寧德化二縣尉部索夙盜囊橐過抵悉知之相戒毋得覘君境人賴以安遷衢州錄事參軍聽獄明審每甲乙參準以鈎取事情不强以楚掠文致其罪故獄無頗類竟案有

可矜輒為奏讞所全宥甚衆在勢者材之辟監洪州豐
城市易務滿歲會省官罷改明州象山縣丞逢受寶恩
遷文林郎數行令事為政簡易人便安之未滿秩復會
省官罷君性溫良謙退居官不以武健干名所至稱長
者隱約自守祿賜緣手匱竭不營歸貲鬻舊業幾盡識
者清之暇日以所謂梵書者自娛進官淹晚聊不嬰意
校吏考十一不絀銖髮過差竟以州縣職沒其身悲夫
配南郡張氏子三人男師孟嘗貢禮部師仲第進士將

仕郎師季舉進士女長歸同郡陳夷簡次歸開封何至
德一尚處孫男一人某令休寧與師仲為僚喜其齒少
自立於載籍博涉精記誦說數千百載事如目擊既又
聞兩昆弟皆蘄然見頭角意其門戶且興亡幾何君來
過師仲見君以德善自晦弼弼若不能言固知流澤有
在也政和元年二月壬戌終於休寧子舍壽五十七諸
孤奉喪歸卜十月己酉寔建德鄉平碧之原走書泣請
曰先人行治微夫子銘且湮沒義不得辭銘曰有所激

以昌其氣惟學之嗜故壯而仕無所麗以直其躬惟義之從故老而窮祚德自天巍巍三子慶充門閭君其不死

著作佐郎陶公墓誌銘

晉著作佐郎陶淵明之後十六世有孫曰直夫字次汲仍居潯陽仕宋亦佐著作大觀三年年四十七二月庚寅以疾卒官陶氏本鄱陽人吳平徙廬江之潯陽有名丹者為吳揚武將軍是生晉荊州刺史長安郡公侃於

淵明為曾祖而公之曾祖鑑為左監門衛大將軍祖稷
大理寺丞父舜咨第進士終宣德郎公嗣舉進士中第
調建昌軍司戶參軍官有殊政會詔諉諸道察良吏江
西使者以公應令遷雄州防禦推官知亳州錄事參軍
改教授懷州談經授業切磋懇至自遠著錄者甚衆遭
外艱去職學徒恨不得卒所聞泣錢者踵相逮也服除
又教授徐州時三舍賓興法始頒方郡衆未曉習公能
推廣德意區別科指行之不少謾傍郡取則焉明年集

貢士試京師徐土人士卒占異等遷太學正改宣德郎
提舉梓州路學事召對詢勞移晷先是蜀部學廩不繼
公至則披圖考籍錄乾沒吏一人寘之理籠利源以豐
歲入窒姦隙以裁日用養士之費始羨遷監察御史入
祕書省為著作佐郎逢受寶恩轉奉議郎公生質秀穎
不凡綜練經學廣窺衆善專精或積歲不踰闕元豐中
補太學弟子員年少耳然志尚風旨魁然出老先生右
一時賢雋皆慕與之交七年秋充貢賦居第一海內誦

其文辭及為吏砥節首公教身自約惴惴惟恐過差氣貌嚴正雖燕不墮處交朋間無擇言之闕居喪舉動遵禮紀而毀憾獨過制事寡嫂甚於兄之存字其孤不啻己子有文數百篇初宣德府君不喜吏職浮沉堯庫數年亟謝事歸家巷故公亦濡迹埋光不及擢序而族昆節夫以儒學將畧致位侍從屢殿大邦終龍圖閣學士正奉大夫胄閥益顯矣公娶張氏亦同志趣後公二年卒男曰忻女一人皆幼能舉公及公妻之喪以政和元

年二月壬寅合葬於江州德化縣先生鄉之原且求予
銘以識葬者尚書司封員外郎悅龍圖閣公子也銘曰
潯陽之城柴桑之里靖節之家有賢孫子不慕榮利閑
靜少言官止著作以屈為伸其尚類也視此刻文

江陰胡君墓誌銘

君諱哲字明叔常州江陰人少為諸生力學問嘗試于
鄉又嘗試廣文館不售即謝去隱居啓山之陽泛觀典
籍以求志二親春秋高念所以娛其意者乃築圃結亭

藝木芍藥千本服老萊衣日侍杖屨容與其間州里稱其孝後益喜交賢士賓至如歸修具甚設資業為替弗計也性勁正而曠達聞人不善必面折之緩急叩門者不以有無為解一時巨公名德多從之周旋因得其筆牘藏之甚富常語人曰吾窮於世老矣然於古人知慕醉吟先生於今人獲從東坡公樂飲於西湖之上竊自幸也晚節刻意宗乘聞道於大通禪師得死生之理宣和七年十月庚子寢疾草誦般若若心經數過留偈四句

有形遷性不動之語泊然而逝享年七十大父忻父惟
恭不仕男二人端彥端文君夙以翰墨畦徑親指教故
其文皆畦然可觀端彥再貢禮部人謂以經術文詞策
名致顯位不在其身而在其子均也一女未嫁孫男四
人千里千能餘未名君以十二月某甲子葬於縣之昭
聞鄉祈仙里之原而見屬以銘銘曰奔名而夸毗瘠義
而豐賢虛生而懵道心之微歛與世其長辭以君之清
操達識而視之吁其可悲

江陰趙君墓誌銘

常州江陰趙君諱越字彥中資夷淡而趣高明少喜視書上論千載人以筆端涇渭之補太學弟子員卒學師友交譽不幸踵丁三母憂積十餘年不獲于試無階自奮崇寧中朝廷大興三舍法羅天下英俊君春秋高矣猶率子弟鼓笥趨鄉校在勢者欲以八行薦之君以宿儒尚多辭焉已而子弟相繼貢辟雍省識者知其訓飭自君出也家世饒貲曾大父某不仕父某與其弟秉義

郎汝弼同籍五十年身任勤劇而縱其弟結交當世名
公偉人雖睦聞東南故君生而漸濡孝友之訓洎專家
政於生業厚薄贏耗一不以嬰意亦不取以自封靡至
人以緩急叩門未嘗有已怨族女若甥貧無齋送皆為
具奩橐擇夫嫁之同產妹既嫁貧不能以自存則并其
夫與子養於家百須皆滿其意雖久弗厭也宗黨稱貸
五十萬輒折券不復索君以財發其義大率類此故生
業寢薄而鄉閭稱長者初娶張氏朝散郎通判信州贈

光祿大夫諱磐之女十有七而歸婦德如老成人閭內無
退言繼室郭氏朝奉大夫諱附之女賢有操行今宜其
家初光祿公見君文奇之妻以長女及觀文殿學士東
平呂公帥餘杭君以文贄一見器許復以甥女郭氏歸
焉禮部侍郎張公滌光祿仲子也與君少俱學且嘗娶
君之妹以其所著易說十卷上釋經局莆田蔡公讀而
奇之以某年某月某甲子卒於家壽五十六有詩文數
百篇以自名其窮頓挫踔厲可喜男廷幹以某年某月

某甲子遷張氏之寔合葬君於縣由里山之原四女長
適奉議郎江陵府江陵縣丞馬毅次適迪功郎章之邵
次適從政郎廣德軍曹掾程元弼一尚幼孫二人曰祐
曰祐廷幹躬孝踐行每以君不朽計為孜孜故君葬既
久而幽刻不輕屬人以某與君皆光祿公婿相習乃謁
銘焉銘曰為善而貽令名不必祿爵始榮其親也種德
而燾餘慶不必顯貴在其身也以財市義家雖瘠而德
不貧也夷考行事而昭之其與古賢者鄰也

中奉大夫葛公墓誌銘

昔漢文帝延見近臣必求天下長者而寘諸位其近臣
進對間亦問曰某何如人某何如人上曰長者皆一時
隆貴人也以故風俗醇厚中外乂安號稱大治後世銳
於功利石材左德篤厚君子不以武健愉快者往往不
究於用如公者多矣可勝恨哉公諱師望字興周江陰
軍人少孤貧自力學問舉進士兩薦開封紹聖元年中
第調亳州衛真縣主簿遷平定令知廣德吳二縣監在

京南炭場通判筠汀楊曹四州主管南京敦宗院提舉
鴻慶宮太平觀仕四十年以長者著名字官自宣德郎
十遷為中奉大夫孫傑察訪淮南挾御香至衛真朝謁
太清宮詢老君殿立侍二像為誰或對以唐明皇文宗
公曰開元中明皇幸亳太子亨扈行今像乃明皇肅宗
非文宗也傑以其多識器之治平定有風迹任刺舉者
交薦諸朝遂改秩在廣德尉得盜希賞文致其罪抵死
公察其寃從末減蒙活者數人邑子以輿梁壞請輸財

於官治新之梁成而羨數百緡郡守擢取以佐公帑公
謝不與悉還之民無幾何州縣在事類以貪墨被訴部
使者臨按之獨公在政廉白乃歎曰廣德清操豈不能律
汙吏哉高安民喜嚚訟公能陪輔其長使郡中清汀州
元夕張燈郡學生數人與寺僧競因敗其燈累百計二
千石怒且笞辱之公從容開說謂人固有跣弛而工文
業者奈何以一眚廢衆士守不聽一日攝事悉放出之
後拔第顯擢者踵相躡時賊擾東南人士北渡維揚者

日數十艘州牧貴人不敢干以私則惟公之求公為奔走勞來供其百須一不闕賓至如歸而交德焉在興仁遇宦者出括民田勢焰薰灼凡不曲意阿附者必罹中傷坐是賜罷而晏然未嘗闕懷也公性沉靜而夷曠燕居如齋雖盛暑對家人必整冠履至為吏一以矜慈麗大罪者必求生麗小罪者每從恕雖自隱其德而所至民親愛之去則遮道而戀慕風知禍福皆前定故自安分義不肯行險以倖遇合官桐川日嘗夢謁靈濟廟神

告以冥數曰後日官至中奉時始通朝籍卒如其言初公令平定時丞相唐公恪董漕事行部至邑見廷無逋事民無退言語人曰使吾部令皆若是復何憂乎自是深知公後佐丞相徐公處仁于淮南事有異見輒抗顏爭辯徐公不以為忤更賢之靖康中二公相繼登鼎軸推轂故吏屬甚衆而公未嘗曳裾奏記於其門免絕課當進官一等逢赦當賜三品服皆匿不自言曾祖惟安祖中敏不仕父錫累贈太中大夫母李氏贈碩人妻先

令人閭丘氏今令人衛氏男曰禔右迪功郎洛州永平
丞曰祺右從事郎常州晉陵尉女長適進士趙格次適
左正言陸震次適駕部員外郎洪興祖孫男三人昭登
仕郎二未名孫女二人紹興二年公感疾不知人閱數
刻復蘇蘇書韻語二十八字有一生方便過人之語且為
先令以授諸子五月甲子日終神明不亂於死生之變
春秋八十明年八月丙申葬于鳳戈鄉之丁陸原諸孤
以某謂公為兄實熟其行治來請為銘乃泣而銘之曰

葛氏江陰世為聞家肫肫中奉嗣德振華以學策名葆
和安雅稽其行治終始長者弗競弗夸城府坦夷至德
感神神實相之告之冥符桐川之廟爵第四品卒如所
告位止州佐所畀者年天祚吉履簪紱綿延鳳戈之藏
卜云其吉銘以昭之茲謂不沒

葛君墓誌銘

紹興元年冬十月某解秩吳興郡居景山族子開真自
江陰來拜且泣曰先人不幸以七月丙辰終方病殆時

忍死言葬必於青暘亡母之兆銘以屬叔父開真不孝
既以其月辛酉葬矣銘敢以治命請予亦泣曰小子忍
銘吾兄耶明年二月書來速銘則為論次而銘之江陰
葛氏其先避亂自廣陵徙居簪紱相承百餘年世有名
德其晦迹不仕者亦皆恂恂謹飭以操行自將君諱權
字執中江陰葛氏子也曾大父惟明大父定父淳俱不
仕大父贈官至朝散大夫君少涉學嘗事科選已而謝
去專營資業以奉親養生送終無悖禮姻族緩急輒賙

貸之空無者每折其券生而篤厚老而康強且死神爽
不亂春秋七十有二娶康氏子二人曰開真去病女四
人皆有從孫男女二人初大父女兄歸樞密直學士蔡
公君謨君珍其筆迹儲之甚富復能記其詩文行事故
一時賢士喜從之游嘗見語曰吾欲築第面惠山以居
而陰陽家之說拘忌數年吾老矣不能待也因趣鳩工
時方域休咎一不問卒成華屋遂燕處之適談者多其
曠達云銘曰天賦之德復與之齡體魄措此惟以永寧

張太安人王氏墓誌銘

贈通直郎晉陵張公諱某之室太安人太原王氏其先
自幽州徙家山陽祖某千牛衛將軍父某左班殿直太
安人端靖而敏悟畧涉傳記言動不妄十有七而歸七
十有九而老八十有九而終少壯為賢婦晚為壽母其
宜張氏凡七十有二年維張氏在東南推衣冠顯姓仕
有並時至九卿者號東西卿家太安人始歸克婉其夫
之德事姑欽愛兼至凡尊嫜行若姻戚媼御咸慶其姑

得孝婦洎專家政幹理有條序非於自奉而所識窮乏
悉賑之晚增築室廬若知其後且大者篤老精悍無疾
日紬佛書求死生之理比易簣無一語亂教家人掖坐
而絕實宣和七年七月乙未也子七人宰為奉議郎陝
州司錄寅再貢禮部宏舉進士有名官從事郎信州刑
曹事宇宣教郎守奉議郎監察御史實數占成均異等
女三人適進士潘民用曹謨蔣軫孫男十有五人美成
康成德成信成師成友成士成餘未名孫女三人初太

安人子衆而貧窶無貲未嘗以嬰慮盡使努力為諸生
以舊所憶衆書手抄教督夜分猶課厲衆子嚴憚若師
既久居益貧或勸其變業征利者第笑不應無幾何子
皆明習經學軒然著名字監察公繇州里首送擢第又
舉詞學兼茂科中之大觀初三子復同榜以上舍入仕
州將表其閭曰椿桂太安人御安輿從子之官輟環數
郡夫婦華髮同享擊鮮柔滑之奉逆送者道相屬也以
子恩封孺人又進今封最後見其子自御史府章求郡

以養於是有識雜然譽歎以謂微此子不能寵其母凡
州閭稱德善之報及母子之德以為可願必指太安人
之家云太安人卜葬得歿之年十二月庚申其兆在武
進縣南鄉千墩村而見屬以銘某謂諺有之學家多士
大夫為學之利太安人所不及見者蓋未慙也因論次
其行事而繫以銘曰其屯弗戚其求弗棘其勤弗易其
報弗忒其亨弗瘠其銘弗泐

樊宜人蔡氏墓誌銘

紹興五年春右朝散大夫主管台州崇道觀樊滋德淵
訪余於吳興曰吾妻宜人蔡氏不幸以去年七月終願
得子銘以識葬且曰宜人曾大父諱仲謀官至太中大
夫生左朝奉大夫元康元康生沅州軍事判官邦直宜
人其季女也唯樊蔡氏並為衢州西安之望族夙通婚
姻宜人始垂髻柔明秀警吾父金紫公吾母文安郡夫
人愛之求為吾婦凡與之齊者若干年尊嫜曰是善事
我娣姒曰是善輯我媪御依其仁族黨稱其睦而吾以

為有閨閭之助也始吾既葬二尊於塔山卒喪躊躇不忍去而從仕宜人啟曰薦香火而護樵牧宜有佛廟衆財不可私取以為悅盍以已力營之因斥賣其裝不留一簪而築室一區延僧主之後劇賊起新安姦人所在嘯聚衣冠墟墓類遭發而吾二塋獨無恙吾嘗里居謀所以嗣宗族之窶貧者吾妻曰所盼么麼彼且緣手而盡曷若營不匱之利於是裂慶牆鄉之別業為義產且以戚疎定多少之差歲給之而人賴以炊者衆焉吾鄉

涉步數郡往來之湊故有浮桁衺數十丈會為水敗行
者病涉吾妻不資於衆垂橐而新之宣城饑米斗錢二
千吾適佐郡吾妻勸吾盡出田祿賑之日為饘粥食餓
者南陵饑甚則市他米諉邑令增給自是大姓爭發廩
而蒙活者不勝計宜人勇於仁類如此奉釋氏至虔卒
之前六十日夢人告以絕羶葷後當坐去及易簀神異
不亂召子若婦訓勅諄諄俄結印坐逝壽五十有五累
封宜人男三人國輝右迪功郎江州錄事參軍國均國

寶皆進士女適右承直郎監潭州南嶽廟葛立方孫男
女合十二人以紹興某年某月甲子葬某鄉之原立方
余冢息也因稔知宜人之賢行且崇道君仕以才奮歷
職中外勞烈有聞而居鄉見謂修潔必有相之者又其
言信而可復乃序而銘之金紫公諱某仕至某官金紫
光祿大夫其贈也文安郡夫人姓某氏銘曰變彼淑哲
來嬪聞家令德是茂靖專柔嘉以財易仁懦者驚嗟帝
錫顯號每恩輒加錦韜象軸書贊之華胡德之豐而壽

不遐將燾厥後陰施豈差我銘幽宮惟信匪誇

徐太令人葛氏墓誌銘

太令人常州江陰葛氏贈吏部尚書諱某之孫承議郎
贈太中大夫諱某之女葛氏族大且顯凡女子許字必
求天下名士令人年既笄辯慧婉嫕太中與其兄工部
尚書某皆愛奇之為訪佳對而金陵徐君安道受經舒
王以才識為高第中治平某年進士甲科隱然有雋傑
之稱遂以歸之其後入御史府為監察入中臺為郎奉

使諸道風節端亮名譽尊顯卒官中大夫京西轉運副
使令人間助為多中大夫求所生戴氏十年始得既歸性
高嚴令人奉養如嫡刺測微旨無銖髮忤戾撫如婦之
孤踰已子單複之服製必先之逮其長為謀家室垂橐
不吝歲時享徐氏祖考不以饌羞委僮待遇父母尊親
之黨恩意均一從夫若子宦四方中外宗姻靡日不嬰
念服哀至小功總聞計皆推勸以喪禮自律逢諱日蔬
食閱經以資其福盡齒不懈太中所嗜蘋栗之屬輒不

忍食官遊舊境復經歷未嘗不涕泗也性淑靈而篤孝
尤加人以夫恩封永昌縣君以子恩封普寧縣太君再
封太令人政和七年八月壬申終于京師壽七十有三
崇信釋氏日課其書且奉其齋戒屬纊不亂呼子與婦
執其手曰吾訣矣泊然而瞑子六人男永朝請郎行太
常寺主簿奕通仕郎知衛州新鄉縣前卒女長適承事
郎常州江陰令李孝遠次早卒次適通直郎武學博士
朱天錫次適宣教郎知平江府長洲縣陸棠孫男二人

女一人永以學行知名薦踐師儒之選自中大夫即世令人食其祿者十九年晚節寢病縣劇視絮縻藥至夜不解帶人士稱之卜葬得令人卒之年某月甲子祔中大夫之封在江寧府上元縣莫府山以某於令人為兄子且先君通奉與之相友愛見屬以銘因泣銘曰性篤孝士所難乾其身行之安婉其良訓厥嗣詔三封壽六紀源有衍報必豐在後人不于躬莫府原龜墨食千萬年安且吉

妻碩人張氏墓誌銘

宣和四年五月乙丑碩人張氏歿於汝州公府時某領
郡以妻亡諗於朝求移守吳興詔許之六月護喪歸常
州留二息奉柩而趨治既卜葬得地於江陰縣由里山
之原復諗於朝取急以視寔詔又許之遂以五年四月
己酉襄事叙其行事而泣銘之曰碩人世籍常州宜興
諱護字靖姜朝散郎贈通議大夫諱磐太碩人姚氏之
女宜興之張世以儒學顯而姚氏在金壇為舊門碩人


於女憲婦順耳目濡染不習以能元祐中通議公為漣
水軍我先人開府儀同三司府君佐之同寮且同郡復
聞其女賢為某授室既歸不逮事皇姑溫國夫人事先
人盡孝衣服食飲親在視寒煖早晏之節愈久滋益恭
於財痛自節縮而儲積其餘以供公上銖髮不自蓄初
叔季二媚未行先人念擇對之不易碩人請以女妹歸
以兄二姓交信之遂與禮部侍郎今知徐州張公合好
後三年季妹許嫁今丞相王公時碩人從子官太學先

人敕使歸董蠶織紉之事既訖嘉禮先人喜津津謂
某曰尚平之累已畢若釋重負而婦助我居多歲中迎
養後如京師會先人棄諸孤碩人送終厥飾盡禮持喪
踊蹕如制於時二兄俱未卜繼室幼稚滿前無衣家徒
四壁立碩人哀掇纖細均已子保視以濟于艱難其後
某比預廷選二兄俱宦輦轂下闔門數百指共室同爨
而姻戚並時顯仕歲時燕集軒騎填里門碩人雖處介
婦而調娛承順曲致恩意中外無怨訾一辭祀葛氏之

祖考饌非手調筆弗進也喜浮屠學日誦其語食不擊
鮮奉觀世音尤力課所謂大悲咒者數以萬億計嘗得
寒疾瀕死觀世音現白衣瓔珞像升卧榻以楊枝荊芥
裓其體尋汗浹頓愈人士紀以詩文者甚衆在臨汝力
疾朝中嶽既還一夕神識去體家人環泣諸子若妾媵
各剔股燬臂灼頂以禱觀世音像復現光相滿室黎明
驟蘇安全四十一日始不幸轉識不亂談者謂累善之
報云初封同安縣君進封宜人恭人後遇恩及擬封兩

封碩人前後訓詞皆稱其賢操春秋四十有九男立方從事郎國子監書庫官立中迪功郎河北鹽香勾當公事立器國子生前卒立卓尚幼女長適文林郎越州州學教授許暘前卒次適承務郎登聞鼓院劉封一未嫁孫三人碩人祥順祇修善區處事於書通大致持身玉霜始予未第閨房百須一不相闕既仕數以懃直賈禍流離落漠而碩人能以義命相譬曉嗚呼繼自今無相我者矣悲夫銘曰委禽兮結褵嬪予三十年兮家室之

宜我辜于天兮奪其所與齊年不配德兮夢人授之以
著生於建平而歿於臨汝兮藏於大江之湄幽窆之詩
不以謗人兮聊寓情而含悲



欽定四庫全書

集部

丹陽集卷十五

十六

詳校官庶吉士_臣張溥

侍讀_臣孫球覆勘

謄錄舉人_臣秦

櫟

欽定四庫全書

丹陽集卷十五

宋 葛勝仲 撰

行狀

朝奉郎累贈少師特謚清孝葛公行狀

公諱書思字進叔姓葛氏其先嬴姓夏后封國於葛後
因氏焉世籍廣陵唐天祐中有諱濤者避孫楊連兵之
亂徙江陰家之其子虧太宗時以高年有德賜爵公士
為公高祖公士生祥高蹈不仕娶焦氏是生惟甫累贈

開府儀同三司吏部尚書尚書娶吳氏封陳留郡太君
生公之考曰審進士擢第卒官承議郎累贈通議大夫
公之母胡氏後母陳氏封安定潁陽二縣君以公升朝
恩加贈建德懷仁二縣太君累贈碩人公幼聰警不勤
外傳八歲賦詩出語已驚人既長刻意學問淹通六經
尤深於易春秋他傳志無不周覽彊記世父兵部尚書
以學行為世儒所宗嘗讀其文語通議曰是子名第不
足言後日且以文義顯已而莆陽蔡公襄丹陽邵公亢

交口譽歎之頭角嶄然羣進士中矣三薦開封嘉祐八年王文公較試讀其所為孔子事道論大加激賞因擢寘異等次舉為陳公襄蔣公之奇所知於數千人中以第三人薦之學者誦其文辭以為軌式熙寧中初以經義取士公中六年進士第調睦州建德縣主簿方是時通議公以清節高尚退老於家抱道履德貶詘世味不迹城郭公夙以祿釜為急至是益堅請迎養之官而通議難之公勸請懇切屢獻詩什敘白華之意而通議憚

行終弗許公意不自得謂曾子一日不肯離親豈能以
五斗移素志公之知己方位要近所親與公厚者咸勸
以仕進且謂就養左右孰若榮名顯親孝之大也通議
亦數以此意譬曉公而志不可奪遂投劾侍養自爾居
親側積十餘年不治田園不事游覽專以供養為職凡
通議公飲食寒煖之節衣食單複之宜藥劑增減之度
皆未嘗以屬僮侍也疾雷甚雨中夜必興問起居平時
家庭逆探其心志所向不敢少戾既絕祿廩兒妾濱于

飢寒晏然不卹大臣有嘉公志行者表為泗州州學教授亦弗就也其後親年大耋法許擇官自便且免赴部又通議公命使從官確許偕行始乞監湖州新市鎮於是通議公滋倦于出游矣特憐公孝誠懇到勉為裝行公得由前志色養夷懌油然不知闕征之卑而鎮戍之陋也當是時衣冠推為父子之美處期年通議捐館公行服過禮柴毀加人雖身疾不御肴酒雖妻病不歷房閭雖盛暑不釋苴菜終制不變每號呼撫臆哀動行路

既久如始喪者日誦大藏經以追冥福時公年稍高在禮當不致毀又以寢苦病臂然終不肯解菜遠近皆服其篤行以為難能服竟不忍去家墓人或勸之仕公不應又累年同升進士方穀為江陰令貽書勉之始出調開封府封丘縣主簿數行令事政有恩惠縣人德之移和州防禦推官知楚州連水縣丞縣居淮海上游方置軍壘號難治公能以政術佐其令縣以大治在勢者才之數諉公攝劇邑及平決旁郡滯訟皆以濟辦審克稱

瀕海產鹽歲輸他路不貲時任漕計者欲穿支家渠以紓鹽艘汴淮之險及舟卒並緣為姦之患會同列首鼠持兩端因檄公經畫之公為巡視地勢荒度土功具言經久之利且條上其所以然主議者倚公為重渠成公私便之歲潦視田能忤上官指悉蠲民租人以為賜也公恬於仕進不求薦達然一時牧守監司皆以公行純孝素著繇盡子職而致沉滯故人人爭欲出已門而薦牘交上秩滿廷見改宣德郎求閒局還里中遂監常州

酒大吏為有私而屬公歎正法者能力拒之雖逢怒弗
顧也遷奉議郎徽廟即阼恩遷承議郎賜緋衣銀魚加
武騎尉知婺州永康縣不赴就差監秀州鹽稅務課羨
當進秩恥不自言序遷朝奉郎被命即歎曰吾在事之
日淺然官得加其親賞得延其子冒國恩厚矣尚何求
即解印綬請老公為人莊重寡欲澹于榮利游京師足
不跡貴人門故仕卒無所遇合連枉莞庫人為矜惻而
公安恬無悶曰吾知當職而已雖小物必親所居以安

遇名軒自號虛子言遇無定遇而安有常安也居官智
慮淵邃小心周慎性矜慈惻怛或盡歲無所譴罰然至
誠格物人不忍欺給事以振舉所至稱長者去輒懷之
為吏無銖髮過差其見得尤廉計日受奉雖半菽不妄
取公田歲入多推以予民市物如將傷之每倍給其值
清苦自刻不殖貨利尤物玩好一無所惑遇人之急調
之不計有無沒之日至橐無一金製衣以殮當世清之
舉錯以義理自律不敢差跌於人無戚踈貴賤皆恂恂

卑體下之燕居家庭無替墮之容與人尺牘雖薄遽字
未嘗輒草也平生不妄語鄉人為不善者不畏法而畏
公之知熙寧乙卯歲大饑斗米數千錢人相食公發已
廩以食飢人賴以全活者甚衆公於外行無不至而孝
友尤出於天資從古人中求殆無以抗十一歲遭建德
憂哀毀如成人已知不如葷矣事後母至孝能得其歡
心通議沒追慕白首不衰時物未祭不先食寒燠之變
必在視家廟歲時然嘗如見其享平居兢兢以其嘗所

告戒者自勉一言及之未嘗不涕泗也伯兄書元長一
歲父事之恩意始卒無間言公官漣水時兄為舒州望
江縣令同隸淮南布使者及六路發運諸公有捨兄而
薦公者輒移書遜避乞改薦兄不許則封檄還之人或
笑其迂而公力行之其後公改秩而兄舉者不應格公
曰吾獲寸進心無媿矣鞠三母之弟如一拊循視遇甚
厚處叔季者自結髮教誘至於成人諸壻擇對引為已
任卒皆得名士歸之多顯者孤甥養妹盡力周撫課諸

子於學而不付以家事文辭義訓皆自指教崇寧三年
幼子勝仲官學省聞公得謝取告迎侍公不得已至京
師暇日多賦詩自適喜為巨篇強韻識者服其老而精
彊當時顏色滋澤步履輕健記問審諦無異壯者不幸
冬十一月二十九日終于城南里第屬疾甚微神明不
亂衆壘更視不問方藥顧告以死生常理瞑目無所係
戀與諸子論說詩文雍容如常時親書先令戒以薄葬
泊然而逝壽七十有三公篤信釋氏奉其戒律晨興香

火持誦不輟自壯訖老言行忠信不欺於心故轉識甚
異蓋信力所薰也訃聞薦紳若州里知識皆痛悼之生
平著文離十卷辭理精詣夸誕浮躁之語一不闕筆號
安遇集三子累遇大禮及三經擬封累贈公官至少師
贈正奉大夫訓詞有曰庶靖樂道愔愔無華養志就閒
久為親而辭祿引年謝事乃有子以克家贈光祿大夫
訓詞有曰高行清修奧學通贍潔廉守義共推靖退之
風愷悌宜民衆賴寬平之政贈特進訓詞有曰葆醇履

坦譽問素休鍾德之祥嗣有賢子踵侍從橐為時蓋臣
宣和六年本州官及進士錢詵等具列行實申常州乞
備申朝廷依張舉徐積例特加賜諡以勸為善知常州
劉光以聞尋蒙賜諡清孝制曰君子篤于行已不繫窮
通之殊朝廷樂于旌賢固無存歿之間協稽羣議垂賁幽
光故任朝奉郎賜緋魚袋致仕贈少保葛某與學承家
高節映世廉靖樂道人默化於鄉閭豈弟近民政自孚
於郡邑顧惟天稟之異卓有古人之難辭榮祿以養親

遠追曾氏之義正弊衾而易簣何愧黔婁之清鍾其餘
休克有賢子繼躋從列咸以儒稱邦典追榮已陟三孤
之貴鄉閭紀實願垂一惠之稱爰錫美名用褒潛德松
楸改色載承雨露之濡綸綍藏家永作雲來之勸緬惟
靈識亦克顧歆可特賜謚清孝贈少師訓詞有曰經行
自著藹然君子之風政事甚明亦高循吏之舉不究於
用以蓄厥休觀上訓褒稱如此則公之德可知矣娶侍
其氏右正議大夫泳之女累贈秦國夫人溫良賢孝實

克嬭德先公十四年卒公以崇寧五年十一月己亥葬
縣之青陽鄉郭莊之原子四人次仲試大司成兼修國
史鄆王景王肅王府直講卹章贈正奉大夫累贈少保
儀仲鄉貢進士和仲右中奉大夫勝仲左正議大夫充
顯謨閣待制孫男十八立隆右承議郎通判鎮江府立
方右通直郎立悌左奉議郎宗正寺丞立中右迪功郎
立教常州排岸立廉立象皆右丞事立經左朝奉郎直
龍圖閣立柔右從事郎立民通仕郎曾孫邢舉進士郭

郇皆登仕郎郇郃皆右承務郎郇登仕郎郇右承務郎
郇郇習進士郇將仕郎餘尚幼謹撰世次行實為一通
上于太史謹狀

太中大夫大司成葛公行狀

宣和三年正月庚子大司成葛公寢疾革詔飭太醫診
治越翌日燕紫宸殿上小語左右訪安否以不祿聞上
驚曰當是為庸醫所誤嗟悼久之特贈正奉大夫贈卹
加常數敕本屬供葬費置官濟辦員外置州通判一員

董之上其子若干人惟葛氏世序自晉稚川為散騎常侍居丹陽至公之六世祖自廣陵徙貫江陰故今為常州江陰人公諱次仲字亞卿曾大父惟甫贈吏部尚書大父密中慶歷進士第以承議郎得謝贈官至通議大夫父書思中熙寧進士第以朝奉郎得謝贈官今至開府儀同三司公父子以清德純孝顯名雖仕不遇合遺澤餘慶實壽厥後公與季弟舉進士聯中調泰州海陵縣尉移常州宜興縣丞未行除吉州州學教授遭父喪

服除為國信條例所檢閱官進北道刊誤志會當改秩
併遷奉議郎逢受寶恩進北使泛例遷承議朝奉郎除
太府寺丞遷朝散郎提舉京西南路常平召見談治道
纒纒可聽上品之謂曰使事不足以屬卿行召用矣至
部未閱月果拜度支員外郎踰年遷戶部逢幸省恩遷
朝請郎公佐邦計歷左右曹周知經用出入盈縮之數及
常平開闔斂散之本蠹弊根穴悉窒之預修續免役書
百餘表除辟廂司業是時朝廷尊榮中外無事上方鄉

儒術而諸皇子齒寢長英敏絕異之姿聞天下既以次
行冠禮出就外傳妙簡僚寮以調護之首以公兼嘉王
侍講授經資善堂未幾建安文安二郡王出閣又兼講
官轉朝奉大夫遷宗正少卿賜紫衣金魚進宗藩慶系
錄仙源積慶圖及預修玉牒轉朝散朝請二大夫其後
安康濟陽廣平三王及鎮國公出閣皆以公為講官於
是並領七府訓授矣政和八年春嘉王與天下貢士羣
試集英文詞學識翹然出寒俊右唱名第一公入謝臚

傳趣使前諭以教導有勞宜褒賞俄被批旨特轉行一
官遂為朝議大夫上愈益欲諸王篤學問詔講官毋得
兼他職除公直龍圖閣提點東太一宮專講事已而朝
論謂不可妨公塗轍歲中除中書舍人遷給事中直講
如初先是有旨下中書後來皇子就學更不除他吏止
以公兼領公意殊不敢當會嘉王進封鄆建安文安開
國景肅相繼出居蕃衍宅因抗疏自列曰陛下過私小
臣使待罪勸講今三王既即外第而安康諸王尚宅中

禁非惟臣學淺薄困於好問且相距遠窮日之力不能
周願專直蕃衍講席其他分命賢俊且使臣逃尸祿之
譏不勝大願上不能已從之轉中奉大夫同修國史陞
翊善進哲宗寶訓遷中大夫加食邑三百戶爵丹陽縣
男除大司成致仕遷太中大夫公侍王府閱七年說經
無慮數十萬言凡典籍所載嘉言善行日陳數千條摭
摭殆盡至古人忠孝大節輒反覆言之間誦說詩文政
事以資聞見之益諸王每質疑問事譔述輒就商榷求

跋法書名畫甚衆府第章表並時亟索操筆立就各極其工宮中傳誦之公每進對上未嘗不稱贊諭之善與輔臣語亦謂公靖共持重得學宮體一日在前上從容曰鄆王學甚進作大字尤佳乞就外第劄子迺親製可取視之因譽公公頓首遜謝在王府三被錫服兩推畀其弟駕幸蕃衍資金帛甚腆諸王各屢揮翰寵之嗚呼盛矣惟天祚神聖並生天材以侈神明之胄而公以孤臣蒙擢序居職累年出入禁闥徧游邸第謹孚周慎不

挂過差遂結聖知入侍帷幄可謂儒者之榮遇矣廬陵
多士隸弟子籍常三千人公分教當興學之始以善誘
著于人聽暨董宗子六學及貳璧水皆以德義師表人
士每較試無不厭衆心外制特不試而用在瑣闥論事
鯁亮凡出命未允若除授不諧衆望皆封還之數相大
禮若夏祭冬祀明堂耕籍受寶皆預執事至若廷試貢
士奏告諸陵率皆在選中公操尚剛方議論慷慨常以
輸忠報國為心處家庭篤孝友執二親之喪毀瘠踰制

日誦藏經雍穆羣弟無間言自開府即世今十七年不
異爨于經術汎濫疏達非疾病未嘗一日去書不觀晚
節尤信內典日課般若洎屬續神爽不亂計聞士大夫
下至閭巷莫不痛惜之而諸王尤極嘆悼各致賻送以
將其意文章典雅清麗成一家言遺藁三十卷少喜為
詩自晉宋以來騷人所賦靡不記誦嘗為集句詩三卷
盛行于時年五十九薨母侍其氏溫國夫人妻先令人
富春孫氏今令人范陽盧氏皆有賢操子六人立隆國

予監書庫官立悌太常寺奉禮郎立廉承務郎立象通
仕郎立會承事郎立民通仕郎女一人適宣教郎提舉
京東路鹽香馮晉孫男女各一人諸孤卜某年月日葬
公江陰縣屠墓村之原敢乞銘以傳不朽謹狀

祭文

祭慕容尚書文

公素康彊畧無疾恙不期信宿遽以薨聞天子驚嗟曰
喪良輔東塗咨嘆曰殞嘉賓凡百搢紳相與悼惜矧聯

親好盡傷如何惟公妙齡連擢科第致位侍從越十五年名節光明論議宏偉具載史牒且詔無窮友悌孝慈古今所罕年不配德咎將誰歸財無偏藏家徒四壁貌孤孀婦一飽無期輶車啟行痛貫心膺聊陳沃醑言不能文

祭劉尚書文

魂兮歸來汨徂南土越五朞些怵惛而愁約魂一日而九升些怵惕不寐精搏搏而渙漑些殞命海浦不生反

於土門些魂兮歸來南荒已久留不可復止些下潦上
霧炎海萬里些厭火之民猛火出其口些蛇山鱷水王
虺騫些魂兮歸來無上天些一夫九首甘人而投之深
淵些九閻杳深巫咸不可叫些魂兮歸來無下此幽都
些土伯九屈逐人駭駭些北鄴三府寒靈不可入些魂
兮歸來入王畿些天恩洋溢反禪栖些蕙宇葯房乃故
居些閭童社叟來安安些魂兮歸來反家庭些仲氏叔
氏歸黃英而主祭些繩繩三息徒跣泣血護全匱些家

人稚孺昔餬口四方今合歸於家些魂兮歸來公既有
此內美重之以修能些畦留夷與揭車雜申椒些雖鬱
邑而侘傺終令名之不磨些人生一世若大夢些禍福
壽夭皆幽運之所繫些簣中牖下均一死些魂兮歸來
跂足以俟些后皇神明揭天日些尺一屬下昭厚誣些
丹筆之籍寬三省些行有雨露洗沉寃些魂兮歸來歆
此嘉旨些飭梁鼎臠和致芳些楚酪吳酸恣所嘗些公
之仲婦我中女些大恩不報負公於幽明些繫官湖海

阻循題而哀號些攬淚承睫聊寓哀以文些

祭劉頌政文

昔長此邦公來逆我道義周旋三改槐火惟政與文猥
見許可時平訟清舒嘯而坐五亭携觴四水泛舸去職
七年家國俱禍及再臨郡我往拜公公病卧閣華堂穹
崇語及時事涕交胸衆製見抵文猶不窮盜起事掣
閣于游從十日不見遽罹鞠凶嗚呼哀哉惟公妙年詞
藻英發文場掄魁經費俊傑書板鍾張才儷管葛謂當

青冥闊步高躡晚塗跋扈意殊不屑薦更州麾連持使
節布政合宮著書省闥在公為窮在人為達晚祚一予
天其乘除有孫繩繩且大公閭惟我固陋日困羽書食
不遑暇阻送輶車遙致奠醊泣血連如何以侑尊如玉
生芻

祭王修撰文

三季以後士夫所養以顯為是趨營擾攘以巧為得尊
昏多固喪已山崖得止銖兩竭竭我公介特骭髀志尚

恬夷情塗坦蕩二十餘年州縣疲鞅聊不嬰意以道自
廣上官薦之始被識賞天府事叢擢佐其長游刃有餘
弊訟無枉召對在前帝方虛想曰汝有子天才英爽中
詔內務是職是掌淵謀嘉謨予所寄仗能教之忠惟子
汝獎卿大鴻臚汝諧汝往父子要津紳紱所仰萬鍾百
年謂當安享遽茲不淑善人誰倣訃音上聞帝為悵惘
賻賵之厚詔發內帑右文密章有光泉壤孝子拜恩僕
僕稽顙寒族通姻行實稱文輅車遵路載瞻遺像一觴

寄哀文諗親黨

平江祭外祖母墓文

某薄祐不天未弱冠失所恃歲朔流邁凱風寒泉之感
未嘗輒忘也舉柩捲而阻飲撫奩鏡以興悲況其所自
出其敢忘哉仰惟二尊德善在躬慶覃後裔是生仲舅
為時名臣載誕淑女來嬪禰廟雖音容已邈而盱響如
存某伏念生不及膺宅相之褒歿未能效立傳之報遠
詣幽宮式瞻松楸因陳薄醊仰覲迪嘗

祭外舅張朝散文

元豐季年公墨諫紙攄忠論事慷慨奇偉可罷可行曰
此曰彼逆鱗敢嬰懦者興起流離十霜以困自喜紹聖
簡求擢官大理通臣颺言秩中御史帝曰汝俞召陞軒
陛開陳纒纒朝綱國是帝用嘉之言傾其耳謂當施行
徑躋華仕如何南箕寢成哆侈佐郡饒陽進尺退咫尺天
不憖遺乃終於此惟公少時趣尚洵美浮念雜好如棄
塵滓沉涵羣經該總百氏陰陽星厯醫卜方伎一物不

知為身之恥蓄藏既多奮發無幾間闕沒身命也天只
昔我弱齡從親連水公實奇之有譽無訛謂器萬乘謂
駒千里恩勤綢繆乃妻以子出入門牆且踰一紀不我
鄙愚數載撫視孰謂半塗遽失憑恃公之介婦又寔女
弟贅幣未行已隔生死丹旌有翻言旋歸止遣辭寄哀
泣濡脯几尚想平生歆此嘉旨

再祭外舅文

嗚呼我公才非命值襟量宏遠如此而所享止于中壽

器業浩博如此而所蒞止于半刺位稍進矣而或困於左遷上欲用矣而中輟於浮議蓋事之不如意者常十之七八而學之稍得施者無百之三四豈志大者終落
落以難合而才高者亦嶢嶢而多忌不然何為進方寸而退已尺前既跋而后亦寔也耶雖然萬有俱空百年如
寄善取名者必圖不腐之傳能徼福者必計不貲之利
公之名節方光於時論而子之仕進且都于顯位以彼
此而乘除殆短長之不異然而感今悼往不能不嚶嚶

以長號者徒以扳聯于親懿而已也嗚呼昔合好于二
姓逮濡留于三歲荷恩育之綢繆服胸懷之樂易悼從
祿之崎嶇遽興嗟于殄瘁攜孥奠觴涕盈兩眦仰惟平
生庶其歆醉

祭張侍郎文

獲從公游四十餘年始研席之博約繼親好之聯綿仕
自初筮而至禁從歲自稚節而至華顛其間所更之世
故蓋未易以言宣進退榮悴之變夷險利害之端有離

有合有悲有歡而終始之不渝者荷恩意之拳拳去年
春公罷廣魯我罷浙川相逢於濰水之上俱止棹而言
旋約歸東阡與北陌款攜杖履於林泉豈期公遽卧於
腹疾嬰二豎而災纏嗚呼哀哉惟公挺學識之精博企
道德之高堅徧躋華貫為世名賢雖不究於大用而忠
言峻節蓋貽萬世之傳我已具載於幽刻茲固得以畧
言嗚呼哀哉公妹歸我已痛隔於黃泉我妹妻公迺遽
奪其所天平生華屋孤幼滿前悼幻境之變化於余心

獨何能無慨然迫遠日之告吉將就窆於新阡撫棺奠
訣感涕流連

祭亡兄司成文

我辜於天天不我喪罰其元昆闔門百口有如水木拔
本塞源來論遷陟書墨尚濕訃音在門變慶為弔心摧
肝裂哀號叫閭憶赴臨汝兄出郊寺數載撫循寧知三
日從容宴笑永隔九原人琴俱亡風流頓盡茲尚忍言
先公盛德理宜有後烜赫衍繁兄實濟美修仁行義所

聞必尊靖共厥位不肯嚙沓封黨懷謖帝用嘉之擢紬
史牒瑣闥詞垣詵詵天才付以調護聽其講論文陞進
對三接獎詞玉色康溫謂當大用而躋中道孰究本元
河通道達今啟藁殞歸駕輻軒追惟宦學我鞠我誨友
愛特敦坐繫微祿小殮弗與初喪弗奔負罪至重遣辭
寄哀聊侑一樽

祭外姑壽安君文

嗚呼夫人維三息女伯歸而亡季夭於處仲居幽閨弔

影踣踣夫人慈之特慎所與惟時長連猥見比數不媒
不龜乃以嫁許自初親迎寓跡門廡濡留不歸再涉寒
暑靡愛不加靡誠不吐薰然恩私指不可僂携提弱孫
逮其絕乳衣食京師不我告寔浚橋之居益見拊偃自
爾携孥適吳徂魯孰云契闊乃隔今古有酒盈觴尚其
能舉

祭亡嫂榮國太夫人盧氏文

范陽之盧珪組紉奕夫人妙齡為兄繼室兄仕未顯家

徒四壁幼穉滿前食衣罔給人以為憂乃獨弗戚撫循
顧復鳴鳩均一爰逮中年兄仕顯榮紫微書命朱邱授
經疑疑衆子簪笏滿門入覲禁闥冠綏寵旌人以為泰
乃獨弗矜勸相夫子輯和宗姻爰暨於老益蕃戩穀疏
封劇郡繼荒大國男女嫁娶母道既畢文祿弄孫齋薰
是力人謂當壽乃遽號復中外驚悼人百何贖某等每
見嫂氏如兄之存今其薨逝茹痛黯魂且卜靈日祔兄
九原輅車遠臨啟山之園聊陳薄醑尚其來歆

祭施氏妹恭人丈

於穆令妹女憲晞兮蘭芬玉潔秀閭闈兮世父偏念遴
所歸兮爰得卿傑賢足依兮幾三十年鳳凰飛兮亦既
宦達家益肥兮雍睦姻戚譽莫譏兮屢封于朝象服輝
兮子皆簪笏環頤頤兮身榮可願世亦希兮謂當益貴
峻等威兮云何不弔殞病痲兮去年罷郡賦式微兮方
諧燕笑事已非兮寔於新阡旒旒緋兮涕泣祖饋頤交
揮兮

